

四庫全書

集部

欽定四庫全書

集部

元詩選二集卷二十二

詳校官中書 臣 王 鵬

主事銜 臣 徐以坤 覆勘

總校官編修 臣 王燕緒

校對官檢討 臣 溫常綬

謄錄監生 臣 陳 璣

欽定四庫全書

元詩選二集卷二十二

庶吉士顧嗣立編

山陰道士劉永之

永之字仲修清江人父應竒知歸州永之少隨父宦游治春秋學能文詞家富於貨至正間四方兵起日與郡士楊伯謙彭聲之梁孟敬輩講論風雅當世翕然宗之洪武初徵至金陵宋學士濂稱其詞翰雙絕贈詩有多少薦紳求識面

江南文價為君低之句永之竟以重聽辭歸嗣  
子奉獲罪縣官籍其家奉既死永之亦徙東萊  
至桃源病卒仲修好書甚篤篆楷行草皆有法  
因自號山陰道士所著詩文曰山陰集門人新  
喻章詰子愚何光彥謙編輯得若干篇孟敬為  
之序謂其遣詞發詠追金琢璧鉅篇短章槩度  
悉合亦元人詩之清麗古雅者也

秋懷

涼颼振庭樹浮雲結重陰中情忽不樂拂几彈鳴琴冷  
冷多苦調零淚霑衣衿遠懷東都士登彼北邙岑悵然  
望京洛五噫發哀吟悠悠千載下誰識古人心

山澗讀易軒

環環碧澗連靡靡蒼山屬初日照林端春禽鳴布穀松  
深有去雲苔靜無來躅獨把一編書時向窗間讀

海屋為蕭君賦

結屋青海上弄影滄江涯手持翡翠竿誤拂珊瑚枝龍

噓春霧合鶴度曉  
雲垂弱流幾清淺  
為書報安期

野老看雲圖

文湍激幽澗白雲流  
遠山偃仰長松下  
延眺一怡顏  
清風拂素服  
瑤花落樹間  
拾薪青煙際  
煮苓供晚餐  
耽此丘中賞  
竟日未言還

門有車馬客

門有車馬客  
駕言發西京  
備諳興廢事  
具識治亂情  
天子既神武  
儲君復神明  
鐘鳴啟雙闕  
王侯方雁行  
要途

無貴戚密地有寒英懷柔建六典戡強用五兵西伐踰  
蔥嶺東征際滄溟北盼礮沙漠南顧定儋瓊金圖啟天  
祕銀甕發地靈八表既蕩一丸有悉來庭鄙人值陽九  
嗟為大運并忼慨攜客泣矯首睇太平

至正壬寅二月二十一日雍虞豈臨江宋理道士  
劉旻李文同登西峰之煙雲臺以登高望遠為韻  
各賦四首

仙山百餘仞振衣聊共登陽林映昭晰陰壑瀉瀉璵璠靈

泓蟠玉蚪丹萸冒翠藤霏霏穀霧斂冉冉卿雲升栖遯  
皆真侶摘挾盡高朋雖非幔亭會終使逸情增

炎運昔中否仙吏乃遁逃朝命三山侶夕謝九州豪碧  
堰儼遺躅杉桂若旌旄登覽值春晏微雨灑蘭皋俯窺  
石壁峭仰羨天路高媿無謝客才翰墨聊復操

素志抱沖澹每懷丘中賞茲山實靈異景物多清曠蜿  
虹蒙垂瀑夫容開疊嶂丹奈遺嘉植青猿流哀響赤城  
如可希閨風遙相望聊為采真遊毋煩北山謗



結構陵紫煙玲瓏望青巘  
花開一水明松暝衆壑晚  
驚麕隱還見長蘿披復卷  
既同風中詠復此林下宴  
流眄屬淹延言歸獨繾綣  
誰言薄當世暫訢塵事遠

秋林讀書圖為章光遠賦

疏雨稍侵竹輕颺已滿林  
山窗敞虛寂席戶映深沈  
沈蠅或夥几蝸牛時觸琴  
酌酒倚石上把卷高梧陰  
披覽未終帙繇思浩盈襟  
羲農倏已遠叔季遞荒淫  
懷哉魯連子輕世有遐心  
願保金玉體遺以瑤華音  
行當拂塵

服就子碧山岑

離思方蕭索  
沉復暮秋餘  
衰蘭空委露  
殘荷已委渠  
獨憶西風宴  
還傷北澗居  
憂來繞庭樹  
閒拈墜葉書  
霜露日淒淒  
園林煙景變  
落日薄寒塘  
斜日明秋甸  
陶尊湛清醕  
瑤枕含幽怨  
寂寞西窗下  
時聞山鳥嘒

和宋學困韻

蹇劣非世器  
固應知者稀  
遺紛憇靈館  
聊以慰所懷  
芳聲契夙仰  
良覲副幽期  
道遙對疎雨  
山瓢時共持  
蘭言

發孤唱酬章媿典彛促席情未慊結軫念當離心知非  
遠別終繫故人思

題匡山石室

羣山爭盤紆衆壑盡奔放中峰最竒絕直立數千丈危  
構倚石壁面勢極弘敞心神坐超忽雲雨接惝恍山色  
晚更佳泉聲靜逾響猶言最絕頂臨眺極所往欲窮千  
里目更試九節杖

精廬極蕭爽乃在匡山涯鮮飈泛林木旭日生巖扉樵

梧隔煙小鐘聲出林  
避階前百尺樹倒挂  
枯藤枝中有  
避喧者禪誦清四時  
挽蘿結幽佩  
紉葉為秋衣  
靜談遠  
公傳東林迹已微  
怡然契玄理  
令我坐忘歸

登煙雲臺同西峰諸友分韻得跨字

振策履崔嵬  
飛步凌雲榭  
俯觀飛鳥翔  
遠見平江瀉  
彈  
棊古桂陰  
酌酒長松下  
谷響嘯哀猿  
林香過山麝  
祈靈  
醉巫覡  
尋真望仙駕  
翠蚪金節導  
青鸞羽衣跨  
逸興殊  
淹留吹簫待清夜

訪驛馬精舍能上人不遇識其從孫蕭生進修夜  
坐誦詩次日書此識別留簡能公

晨起忽不樂驅騎高原行四方多嵐氣日照孤峰明亭  
午際江渡煙艇浮沙汀登岸迷所適歧路方縱橫忽憶  
驛馬寺久慕能公名詢途向煙霧阡陌互紆縈漸入石  
路窄松蘿藹冥冥龍象雖寂寞廊廡猶崢嶸道人赴齋  
出鐘梵杳無聲款戶識之子開室出相迎宴坐畢餘景  
空花聞夕馨佳句誦新作摘藻豔春英山尊瀉芳醕秋

蔬摘霜莖性昧空寂  
甘心樂儒雅清夜止  
西窗宿風條中夕鳴  
病客既多感聞此心  
骨驚明當舍之去沿  
流到江城方從湖海  
游暫遠林壑清山門  
蔭深沼中涵苔蘚  
青法源庶無竭歸日  
濁塵纓

過安慶懷余青陽先生

淮壖古重鎮龍舒寶  
雄冠顯顯青陽公銜  
命茲屏翰文能宣皇  
風武能折兇悍仁能  
撫士卒知能輯流散  
孤城抗千里一身當  
敵萬運否拙壯圖時  
屯負英算城亡遂

捐軀仗節死國難忠義凜霜日聲名炳星漢  
我來當夏杪延覽遂興歎俯仰成古今興亡  
猶在眼疲人稍歸廓  
買舍臨江岸午風舟舫集夜霽燈火亂精靈  
或來往廟食儼容觀生為烈士尊死為奸臣  
憚嗷嗷吟詩臺千載  
汚青簡

擬古

南國有佳人秀色麗春陽素手弄機杼織綺  
向蘭房涼宵步玉階羅韞霑微霜坐愁容華  
歆中宵理絲簧鳳笙

歡未散瑤瑟怨何長哀響激林木回車動華堂借問此  
何曲新聲奏宮商東隣有游子聞之感中腸願持五襍  
俎繫君羅襦裳攜手共遊行卒歲以翱翔中情莫自致  
脈脈懷內傷

贈義士郭生

郭解古游俠然諾聞公卿片言苟相許九鼎相為輕操  
丸過洛社挾丸出咸京寶刀酬劇孟白璧奉侯嬴去之  
千餘載君今振家聲衿懷還個儻壯志復崢嶸脫略時



俗子調笑狎羣英華筵間綺席甲第連朱甍駿馬桃花  
色金羈翡翠纓良時事遊冶南陌復東城一朝風塵起  
高義激中情傾家赴國難誓將斬鯢鯨長揖二千石遂  
長萬夫營營中燬羣盜墮垣委榛荆千金出私帑梁棟  
聿新成門廡既弘遠堂構復高明三軍盡鼓舞羣公亦  
歎驚由來豪傑士乘時樹勲名生當執金吾訓練羽林  
兵誰能對青簡齷齪稱儒生

感遇二首

腐鼠嚇鵙雛魚目欺明珠由來青雲士高視笑泥塗廣  
途馳駿馬長戟夾高車光榮被九族氣燄陵萬夫祇言  
固恩寵豈悟有榮枯菜蔬生朱門鵬鳥瞰賓除徒聞黃  
犬歎千載為驚吁回眦揚子雲獨守太玄書

大道直如矢曲徑紆且盤舍車康莊內遵彼狹邪間狹  
邪多妖麗一笑好容顏金鋪間綺疏青樓入雲端羅袖  
為君開瑤琴為君彈明當結綢繆魚水比交歡一朝青  
蠅至白璧生疑患恩愛生頃刻平陸起波瀾早合雖足

貴中捐良可歎

新歲有感寄簡席煥章胡居敬

積雪蒼茫裹寒山慘澹中艱難經日別漂泊此時同筋  
力年非壯詩書道未通狼煙春戍火禽語夜溪風心似  
西橋水滔滔日夕東

遐想亭為憲史劉原善作

柏府多清暇西曹愛苦吟結亭修竹淨開徑古苔深拄  
笏延朝爽抽毫對夕陰色分滄海樹興接紫山岑鶴唳

雲侵戶鳥啼霜滿林冰紈韜羽扇素錦藉瑤琴佩響玲瓏玉杯浮錯落金管寧應有約早晚共幽尋

江濱小警胡居敬助教來訪雨中有述

日月歲年邁風霜道路難晨刁傳警急夕火報平安江  
遠連三峽山危過七盤轉蓬嗟共逐落葉喜同看散帙  
依松儿抽毫點石闌劒神終兩合璧美竟雙完雲物含  
朝慘琴尊盡日歡慈烏低避雨鷺鳥急衝寒迢遞吳天  
迴蕭條楚塞寬魏牟心獨切目斷北飛翰

池閣獨坐懷周伯寧諸公

沓閣林光合，冰簾水霧消。  
虛池含碧鑑，古甃疊青瑤。  
境託祇園迴，泉分別圃遙。  
雙桐陰覆地，疏竹榦陵霄。  
珍鳥銜珠果，金魚蔭翠苔。  
輕颺吹白苧，涼露濕紅綃。  
鸚鵡懷深酌，空侯想緩調。  
含情寄柔翰，幽賞憶清杓。

酬寄伍朝賓

才子多文藻，京華富友朋。  
價同千里駿，情似九霄鷹。  
學省然官燭，侶樓對市燈。  
醉傾光祿酒，渴飲凌人冰。  
馬惜

障泥錦人輕半臂綾御溝縈似帶馳道直如繩青瑣彈  
冠入朱門躡履登時清周道泰運否楚氛騰六郡良家  
選千金國士徵星驅千載烏露宿騎縣棚在苒山河隔  
蹉跎歲月增鯨鯢依巨浪虎豹嘯高陵野燒兼風起邊  
烽共月升候雞晨喔喔警鼓夜齧齧水市船通賈山邨  
屋近僧陶尊深泛蟻竹簡細書蠅交愛虞生好詩憐辛  
子能速書同客寄遺豪借人膽古道時因棄孤忠世共  
憎相思愁極目惜別淚霑膺日晚凋琪樹天寒落翠藤

願堅松柏操海宇遲中興

望香爐峰讀孟浩然詩因述

移權望廬阜香爐舊識名鳥飛千嶂碧日淨片雲生傘  
瀑長虹下溪深猛虎行松門通佛宇蘿徑繞檐楹業愛  
遠公白詩欣孟子清余方謝羈束幸此共芳聲

春日宴胡助教寓館次傅商翁韻

高館向山開相將海燕來蘭散升玉俎椒醕瀉銀杯雨  
竹藏幽鳥風花點綠苔傷春無限意偏憶豫章臺

畦樂園

郭南抱甕者久與世情疎砌長龍須草林開燕尾渠  
輶花下轉萬芭雨中鉏蔗熟能相寄酬君蠶葉書

詠荷葉

圓緘初出水規蓋已迎風色迷青鳥度蔭密戲魚通  
裁衣偏覺爽酌酒乍如空向曉珠搖蕩時瀉玉盤中

贈傅元賓兼謝梁徵士

百里訪柴荆秋原獨自行屐露山雨滑衣染澗雲輕  
賣



卜應潛姓工詩不趁名故人枉書札煩為謝高情

溪山漁艇圖

夕陽延莫景秋色遠冥冥流水雙溪綠寒山九疊青石  
樓依古木草徑接遙汀釣叟長年在何人問客星

和楊伯謙韻

酌酒長松下垂蘿拂酒杯異禽窺藥鼎乳鹿卧書臺澗  
水穿林去山雲帶雨回相期同結屋不厭野人來

送吳德基赴安化令

春江望不極芳草綠江潯千里長沙道孤帆去客心縣  
城依水國吏語帶蠻音到日應無事華亭自鼓琴

和胡參謀書懷韻簡彭書記

青年杜書記白髮漢郎官曉佩聯清響春衫柰薄寒詞  
賦哀時切詩書易俗難頗聞邊報早聊足慰辛酸

玉峽潭陂山莊

歲杪涉風煙連邨熟芋田路危楓葉斷石險桂根縣鹿  
柵成山疊漁梁阻澗泉爭心逐時化耕鑿喜安然

輓吳子茂

昔仕龍驤幕英風國士前  
忍將和氏璧深瘞北邙阡  
擬續王孫傳愁看絕命篇  
重尋結軫地漬淚為潺湲

題張四孝廉山居

家住秋山下紛紛霜葉飛  
雨微檐滴緩風急雁聲稀  
楚國戰初罷贛城人未歸  
憐君奉甘旨終歲掩柴扉

經湖口縣

古縣開湖口高檣集岸隈  
山從廬阜起江向武昌來  
近

水皆楊柳荒城半草萊客心元自速更遣曉風催

題方方壺畫仁智圖為道士主默因賦

玉檢神仙記瓊壺羽士家軒窗明月冠佩翦雲霞白  
鶴窺殘奕青童掃落花憶曾訪丹術楓徑駐輕車

同傅商翁何彥正舟中有懷辛好禮韻

浮雲無定姿青陽易消索渡口人獨歸雨中花盡落風  
急賈船稀春寒客衣薄所念同心友天涯尚漂泊

沙際水痕交細草蒙茸長春江下連雁夜雨同孤舫佳

期違宿諾歡笑懷前賞餘燼落寒燈卧聞漁版響

寫墨竹二枝并題與章子愚

落日洞庭西曾聞唱竹枝十年江海別風雨漫相思

題墨竹

新雨收金玦輕風轉玉環截筒為九寸吹向武夷山

寄彭聲之

新蓮已屢摘君子意何如憶在湖西舍花間獨釣魚

題綠野春陰圖

野色連青藹，春流澹碧沄。  
蕪蕪隨處綠，離思滿南雲。

秋日同友人泛舟

來把青竹竿，學釣水中魚。  
經年消息斷，疑有故人書。

子昂竹石

古研麝煤香，書傳雨漏牆。  
高齋對松雪，隨意寫瀟湘。

為潘仲暈題定使君所贈馬郎中畫鶴

郎中畫鶴稱第一，江海十年多見之。  
蘭皋明月照獨舞，雪影參差風倒吹。  
滄江玄圃三山上，琪樹金芝日應長。

萬里懷歸惜羽毛中宵怨別流孤響通泉素壁久漂零  
忽見新圖百感并華亭舊歎傷心切赤壁扁舟入夢驚  
綠錦池邊飼秋雨驟騎多情每同賦相思欲報故人知  
為傳一札東飛去

田園幽隱圖

我家清江縣城北竹梁花球環深宅隣屋分燈夜讀書  
仙山借鹿春耕石蹤迹年來逐轉蓬萬事驚心舊業空  
無錢買山惟愛畫坐對新圖如夢中柴門茂樹森相向

野水山橋接空曠雨足沙田野犢閒風回茅屋晨雞唱  
隔林炊黍起新煙接竹穿籬引澗泉傍隄榆柳皆新種  
近舍柘枝不記年山深住久疎城府人情頗訝今非古  
酒熟頻開白社尊家貧時賣陳公屨邇者中原相犄角  
錦袍白馬相馳逐得失俱隨去水流至今猶記王官谷  
劉宗海為余作清江春雨碧嶂秋嵐二圖賦此贈  
之

劉君早年善山水得意往往圖樵漁西昌城西一相見



忽然贈我雙畫圖圖中似是清江曲春雨蒼茫汀樹綠  
煙中髣髴辨飛帆水際依稀見茅屋漁郎繫船江石上  
一夜磯頭水新長孤邨日暮煙火微渡口歸人暝猶往  
碧嶂層巒翠轉奇嵐光秀色含朝暉風林落葉灑青壁  
雲壑流泉生翠微我昔結廬此山裏每愛秋嵐淨如洗  
經年奔走厭風塵偶看新圖心獨喜憑君添我小綸巾  
明當歸掃山中雲他日君來一相訪松根為子開柴門

題金華余仲揚山水

人言吳中山水好，坐使絕境那能到。金華山人懷故山，  
時拂水紈寫幽島。贈君此圖更絕竒，妙墨精思奪天造。  
陂陀重阜隱喬木，掩仰遙汀帶文藻。石嶠雲生莫色微，  
海門潮落秋風早。賀監居臨鑑湖曲，子猷宅近山陰道。  
江清落日檣船回，照水新袍影顛倒。高情千古摹前哲，  
世俗紛華豈堪保。經年烽火徧江南，萬壑千峰迹如掃。  
畸人奔走厭塵濁，試觀圖畫開懷抱。思傍幽林結茅屋，  
柴門低映寒藤老。放鶴前山戴笠歸，獨把長劔拾瑤草。

題古木幽篁圖

近者天下寫竹枝息齋子昂最奇絕金釵折股錐畫沙  
直以高情寄毫墨後來小李用家法更覺縱橫脫羈勒  
御榻屏風或詔寫流落人間豈多得我家真蹟兼數公  
錦囊玉軸複壁中舊宅荒涼經戰伐故物多隨煙燼空  
此圖尋丈小李作位置頗殊標格同半身古樹色蒼潤  
篁筍因依相澹濃長林無人秋氣入蜿蜿蛇蛟起幽蟄  
蟪蛄垂絲畫陰靜老鶴矜昏雨集黃陵廟前湘水深

捐玦江皋思俯拾浮槎尋源遡空濶折旌低渡玄雲溼  
何郎兄弟最好奇愛此不減珊瑚枝幽居正在蘭峰下  
亦有喬木當窗扉共展長圖幽興發六月涼颺生葛衣  
還君珍襲增歎息他日重看覩舊題

題傅商翁觀松瀑圖

山風蕭蕭晝寂歷長松落落倚絕壁紫煙乍留青巘中  
瀑布迸落蒼厓石山中之人形骨清幅巾藜杖時獨行  
溪回陡絕去無路坐撫瑤琴摸劍聲我亦平生慕真賞

十年誤落江湖上故山蕭條久不歸  
夜雨秋衾夢常往  
人生適意無是非雲林久與幽人期  
九節預栽青竹杖  
明朝試拂辟蘿衣

題何武子所藏簡天碧松圖

蒼松偃蹇如短蚪垂肘近人寒不收  
悲風蕭蕭生晝晦  
古鬣墜水令人愁錦鞞騎馬山陰道  
石黛空青拂衣好  
萬里江湖隔舊游坐觀圖畫空山老

送羅與敬歸西昌

石龍磯畔多芳草游子憶家春已老水北楊花撲地飛  
旁人漫道飛花好愛子不忍別送子到水濱青天孤影  
飛黃鵠落日長風吹斷雲朝發銅塘津莫宿青泥渡帆  
過孝通祠漸是西昌路金魚洲遠樹青青三顧浮煙生  
杳冥石扶壞道通高閣水齧危沙見古城君家正在何  
方位獨有園廬俯江渚昨夜深閨夢遠人相思定倚櫻  
桃樹

題金人獵騎圖

昔者金源起東北萬馬南馳蹴中國青蓋趨燕良岳推  
殺氣如雲暗吳越天旋日轉息戰爭裹革包兵交玉帛  
朔南無事號太平頗習華風變蠻貊既尊儒術尚文事  
立進畫圖供玩閱是時張戡畫鞞馬尺素流傳擅聲價  
此圖彷彿戡所作似貌燕山馳獵者秋高露白葭葦黃  
隱約寒山接平野鹿羈鶴轡赤茸鞞騎影聯翩意閒雅  
龍媒振鬣望空濶足若奔暑汗流赭前驅後逐爭英雄  
左旋右轉若回風駕鵝鷺驚飛百獸駭蒼鷹脫臂騰高空

策馬數獲落日紫金盤行夷饜奴僮當時觀者徒歎息  
寫入丹青真國工古愚先生最好事錦標鈿束紆鸞龍  
郡齋展玩當清晝驚飈颯颯吹簾櫳白頭書生幽薊客  
不覺涕淚霑膺胸百年興廢恍如夢苜蓿蕭蕭迷古宮

茅屋讀書圖

峨峨蒼山白雪冒之靈液滲漉瀉為清漪帶我林薄環  
我蓬茨春日載陽卉木華滋呦呦鹿鳴泛泛浮鷺敘此  
幽獨理我琴冊嗟彼聖賢遺我令則顧瞻周道零露在



草駕言從之中心慄慄澗有蘭茝山有薜薇逍遙卒歲  
皓首為期

題夢鶴軒圖為淦守曹仲修賦

綠髮山翁宮錦長十年淪落江之涯扁舟夜傍弄明月  
夢逐西風孤鶴飛孤鶴西飛渡江渚星斗沈沈遠山曙  
逸思騫騰八極雲霜毫點染三秋露梁園才子蘭臺賓  
露幌行春移畫輪未論羽翼沖霄漢直道襟懷如古人  
山城休暇多賓客共展新圖綺軒側一曲寒波照縞衣

坐令長憶林皋宅

白苧詞二首

象牀玉瑱鴛鴦裊銅盤畫燭燒紅雲芳尊蘭勺霑朱脣  
白紵高歌動梁塵請君試聽曲意新揮金縱歡及良辰  
落葉辭條無再春遺令高臺作歌舞鬱鬱西陵那得聞  
連枝蜀錦鋪金堂中山旨酒實瓊觴豹胎猩脣出中房  
博山火紅夜未央催弦促柱歌吹揚輕身向君回玉璫  
妖姿豔態世無雙君心胡為樂遠行

車遥遥

車遥遥行漸遠男兒徇名不計返前年客邯鄲去年出  
秦關今年驅車復入燕城巍巍十二門龍樓鳳閣起中  
間大道通衢容九軌狹邪歧路相鉤連壯哉佳麗地王  
氣若浮煙四海為一家天下方晏然列侯皆藉先人業  
丞相偏蒙太后憐兄弟幾人乘畫轂父子七葉珥貂蟬  
貴者自復貴賤者自復賤劇辛樂毅徒為爾竒謀異畫  
不得薦朔風吹沙欺黑貂拔劍憤歎起晨朝上林三月

花正滿帳飲東都攀柳條金尊酒盡客言別揚鞭復駕  
車遥遥向何許千里行行至單父因從魯諸生橫經折  
今古束帶纓儒冠折節耽文事十載芸窗自讀書人言  
詞賦比相如高車大馬消散盡寂寞衡門駕鹿車

### 猛虎行

山居近多虎害食民耕牛畜豕民甚苦之古人  
有以文感異類者此非涼德所及聊為歌詩以  
訟之

猛虎何咆哮的，頽黑文章兩目夾。明鏡牙齒若秋霜，朝  
嗽一青兕。莫餐雙豕，狼饑舌澹，哺如血鮮。領子時蹲古  
冢顛樵，采不敢過草木上。參天夜深月黑，風號谷還向  
近邨。噬黃犢十室九室，牛園空野翁。磬磬老婦哭田荒  
無牛不得耕。官中增賦有嚴刑，鞭箠恣狼藉。羸老豈足  
勝去年甲士，頻經過。白晝劫人家，復破軍中貨。牛動千  
頭，家家無錢那。可求里胥曉至門，怒目氣如山園中。一  
豕大如犬，明朝買米去。輸官未足了，官數少寬里胥怒。

猛虎夜復來銜之上山去猛虎乎爾何愚天遣烏兔肥  
爾軀今胡使人饑不得食寒不得衣憔悴如枯株駟虞  
有足不踐萌芽獬豸有肉唯觸奸邪爾獨恃力不恃德  
使我為爾長咨嗟人為萬物靈力莫爾敵心懷忿憤不  
能平思翦爾類緩我生黃間毒矢係長絲草中潛張當  
路蹊爾行不虞絰其機爪牙雖利將安施食爾之肉寢  
爾皮

行路難

涉水多蛟龍跋山多猛虎荒城荆棘上參天大澤修蛇  
橫草莽百里黯慘無人煙驅車慎行陷泥滓前車軸折  
後車來行人不覺旁人哀眼前道路已如此何況太行  
高崔嵬為君歌路難請君試一聽位高金多豈足貴擊  
鐘鼎食何足榮東溝水流西溝涸昨日花開今日落世  
事榮枯反覆手七尺之軀安所託古來賢達人與時同  
卷舒龐公鹿門隱馬生鄉曲居歎段聊來下澤車何用  
終朝出畏途

醉贈何能舉

與子十年不相遇，豈意今日重逢君。  
狂歌痛飲自吾輩，世間俗子徒紛紛。  
林木蕭疎溼秋雨，蹇驢嬾渡溪橋水。  
咫尺西風隔白雲，羣仙環佩月中聞。  
重陽好約冰壺子，同入仙源避世人。

周所立江邨草堂

將軍舊日曾分祿，為結茅堂草覆檐。  
過橋柳暗烏爭樹，當戶花開燕入簾。  
醉書江石兼雲冷，晚飯山苗帶露甜。



之子多才空白首獨將詞賦擬江淹

雲卧山房為了上人賦

空山雲卧杳難尋惟許人間禮磬音龍起益中生片影  
鶴歸仙頂結輕陰化為法雨霑衣濕散作天花繞座深  
去住了然無定著祇應猛虎識禪心

仙溪書院為何能舉賦

江海歸來兩鬢霜仙源深處結茅堂參差樹映春山遠  
窈窕橋通碧澗長金匱藏書遺鳥迹石田種玉起虹光

只愁來往迷化嶼預擬藤陰問釣航

淵明入社圖

空山樓觀遠蒼蒼路出深溪石磴長  
近瀑飛雲經樹溼穿花流水過橋香  
高僧喜識杖屨杖穉子歡迎薜荔裳  
入社幾時還入社松陰十里到柴桑

贈別傅商翁

蔗園瓜地楚山春野鹿梅花照雪筠  
隣甕共開桑落酒客衣猶帶豫章塵  
舊彈長鈇馮煖老新著衡書季子貧

夢繞西州歸雁遠何時同采莫江蘋

同聲之宿蕙樓齋臨別賦簡

故人共宿幽齋小扁竹花開映紫蒲采閣冥傳浮水箭  
金城朝建相風烏朱絲鏤管書苔紙銀簾秋衾夢橘湖  
明日棹船金水去煩君臨別贈文無

為高安何思恭題方壺所畫山水

古象山中白晝閒紫煙樓觀鳳笙寒試分玉井三秋露  
戲寫方壺九疊山老樹模糊常帶雨茅茨瀟灑鎮臨湍

知君隱處渾如此持向荷峰錦水看

北澗春日

喔喔野雞鳴遠林  
瑤琴揮罷思惛惛  
寒林山色難生態  
春入溪雲易合陰  
畚隴夜燒諸土俗  
城晝掩識邊心  
芳皋杜若相將綠  
偏覺騷人幽怨深

題巴丘龍母廟

天開玉峽兩崖丹  
隔岸諸峰似翠鬟  
神女不歸龍已化  
仙翁飛去鶴空還  
碧壇芳草經年合  
古殿蒼松落日閒

萬里長風起天末如聞環佩白雲間

寄淦川友人

廢郭浮煙合綠蕪茅茨星散縣樓孤江連戈舫鳴春鶴  
樹對寒燈起夜烏古研自磨銅雀瓦坐羶還疊罽賓羶  
市南美酒梨花白最憶青絲係玉壺

送錙子堅之袁城

雪色征袍拂曙飈宜陽西去思飄飄千峰靜對芙蓉幕  
三峽遙連蟠螭橋檣得雀舟衝雨緩借來驄馬向春驕

青年書記相知久共按秦箏和玉簫

讀黃危二閣老送何彥正歸省詩序追賦一首

水滿金溝柳著霜行人驅馬上河梁公車未奏三京賦  
祖道爭持五色裳班固文章傳太史鍾繇書法繼中郎  
澗河夜雨燒銀燭坐聽疎鐘憶建章

題鄒惟中西樓

西樓遠對鼎山斜野客來尋駕鹿車行嶼暝煙浮翠黛  
石田秋雨潤銀沙清尊未酌心先醉往事重論鬢欲華

有借溪南三畝宅從君學種邵平瓜

用韻送梁徵君孟敬還石門

渝曲經年不見君偶同江郭看飛雲蚌還乍喜雙珠合  
龍躍終愁兩劍分蹤迹每同樵客隱姓名已被聖人聞  
暫隨郡邑還歸去應念山中白鹿羣

和友人過象牙潭韻

一曲寒山照水清哀鴻驚鵲亂江聲浪翻白雪千尋險  
天接浮雲萬里平前輩總隨煙霧盡虛名真似羽毛輕

高懷欲棄人間事  
同向天台訪赤城

次友人鍾陵眺望有感之作

萬堞參差啟四門  
滄江一望客消魂  
鳳迷吳女瓊軒月  
蝶濕滕王畫棟雲  
孤鳥飛空看漸滅  
連檣依淺坐成醺  
獨愁交午歸來鶴  
漫有仙音忍重論

寄西峰李絳之

漢家仙吏駕雲螭  
遺迹空存碧蘚滋  
井底龍飛山客見  
峰頭鹿過野人知  
芝田舊長千年藥  
石室新題五字詩



寄語山中李道士好將苦學慰深期

寄梁孟敬

菰山之陽隱者宅日午隔溪聞讀書時有門生陳八簋  
再從家僕致雙魚石門雨過篔簹濕華戶秋深薜荔疎  
已約莫春攜稚子詠歸沂上曳輕裾

舟中望九華山

春游秣陵涉夏還船頭初見九華山乍起雲煙碧窗外  
忽生金彩夕陽間玉幢字隱仙書古石扇苔青洞府閒

安得山東李太白共看山色弄潺湲

到郡不入城寄彭聲之雪印太虛

鳳洲秋水日漸漸江水渾如博士衫草屋結來人假宿  
檄文書就手親緘裁詩久愛中丞麗制酒難禁吏部饒  
相見立談還卽別寸心搖曳似風絲

遊承天宮

石橋流水隔飛塵古木蒼蒼繞澗濱靈燴舊栖逃漢史  
白雲曾識避秦人冠裳千載遺瓊笥環佩三秋集羽輪

翠壁丹厓如夙契欲持名姓紀嶙峋

西昌蕭鵬舉索其師北平按察司副使劉君子高之詩千餘篇過潭溪山中欲余選擇將歸而刻之予高余友也負竒才碩學知名當時其詩今翰林侍講學士宋公評之至矣余何足以知之徒感鵬舉師友之誼重增故人之思次韻二章聊答盛意他日子高見之當發一笑也

錄一

雨過山居竹色新華門松戶面嶙峋錦囊湘帙聯佳客

玉節青驄憶遠人  
薊北烏啼官舍晚  
江南鶯囀故園春  
蕭條萬里俱華髮  
月落西窗入夢頻

題宋能敏青壁軒

沓嶂層巒翠幾重  
神光動處有竒逢  
霧生深谷藏玄豹  
泉落陰崖化玉龍  
丹篆曉書朱露溼  
碧窻晝掩白雲封  
何時携我青藜杖  
結屋來依五粒松

酬別宋贊善大夫景濂二首

西閣垂簾坐夕陰  
每因朝退共論心  
文章千載知音少

獨立蒼茫感慨深

大秀千峰菡萏開  
玉梁高接九仙臺  
預從山頂結茅屋  
待得先生跨鹿來

四時詞

錄一

學士峰頭雁正過  
將軍峽口柳無多  
雲屏露冷衣裳薄  
欲擢航船采芰荷

題竹

溪藤潤帶空青色  
湘竹寒生琬琰文  
何處幽尋不可

夜深山雨隔窻聞

聽琴圖為周易題

韋帶筠冠白氎衣龍脣鶴足軫文犀試看十指風泉繞  
曲裏時聞烏夜啼

題畫鷹

猶記鳴鞘出霸陵新豐市北醉呼鷹於今豪氣都消盡  
閒看新圖別雁燈

題郭熙春山

紫霧春山綠樹齊  
水流花嶼亂鶯啼  
蹇驢烏帽歸來晚  
恰似成都濯錦溪

題扇

烏絲細寫蠶頭篆  
白紵新裁燕尾衫  
雨過西軒苔色淨  
澗中雲影似江帆

秋江晚釣圖

淺渚環洲隱釣篷  
寒藤古木落秋風  
十年閉戶空山裏  
忽憶江湖似夢中

和曾都文韻

戍鳴笳起畫樓滿天涼月恨悠悠離人一夜思親夢  
度盡巴江楚水秋

題竹三首

小窻新霽綠陰稠隨意揮毫做薊丘老鶴哆翎回舞態  
洞簫吹徧石林秋

洞裏仙人白兔公手持玉笛向秋風彩雲低度天如水  
吹作龍吟山月中



讀易茅齋夏日長琅玕繞屋擬瀟湘山風一夜吹疏雨  
共愛西窗五月涼

題扇

金鳳洲頭倒玉壺銅塘浦口送飛艫他時若記分攜處  
花滿春城聞鷓鴣

飛仙圖

綠膺么鳳載瓊簫霧鬢煙鬟向月飄閨苑獨歸仙路遠  
九天風露溼紅綃

和何平子韻三首

碧池萬柄青荷葉相映茅齋水霧深滿酌君家琥珀酒  
時時扶醉過花陰

雪竹霜筠負所期寒雲飛雁影離離縣知磐石蒼苔上  
猶有山陰道士詩

蕭蕭官柳著霜稀水鳥沙禽弄夕暉明日鍾陵相祖別  
金盤斫膾鯉魚肥

重過何氏席上作二首

霜筠雪竹莫雲寒  
采筆題詩點石闌  
銀燭金尊重到日  
老懷不似少年歡

謝家羣從最多賢  
第宅新詩綺戶連  
預喜酒闌賓客散  
看傳銀燭散青煙

寄彭聲之

素紈便面小行書  
最愛風流半醉餘  
芙蓉楊柳娟娟月  
何處相逢解玉魚

寄西峰道士七首

栖碧山人兩袂輕  
玉蛛盛得露華清  
新詩不記人間事  
盡寫瑤臺閨苑情

古墨輕磨紫麝臍  
白雲窗下小書帷  
何時為寫梅君傳  
換得鶯羣映錦池

百尺飛樓接太清  
萬年枝上月華明  
鹿車入谷無人見  
應是仙人衛叔卿

小鳳雙吹紫玉簧  
雪毛丹頂唱雲章  
碧桃開徧靈芝長  
萬壑千峰露氣涼

夜禮珠衡佩玉鏘慶雲低統鬱金章空中鶴語神君至  
睡鴨頻添百和香

瑤壇丹柰景闌干不比人間荔子丹明月娟娟清露濕  
碧苞珠實滿金盤

石室虛明隔紫煙靈文中闕白瑤鑄丹書隱字誰能識  
歲月應題建武年

北澗夏日二首

酒傾蘭勺石泉香水翦荷盤露氣涼誰料十年江海興

閉門疏雨對橫塘

白紵衣裳碧玉冠  
綠波池上獨盤桓  
水禽飛下涼颼起  
閒看冰荷側露盤

夜宴定侯宅醉中口號

刻羽堂中畫燭明  
將軍夜醉水西營  
青樓小婦新承寵  
彈得涼州第一聲

吹簫圖為劉海陽賦

曾引雙飛綵鳳來  
紫瓊鏤管上簫臺  
於今無復人間夢

一曲閒吹坐碧苔

題墨梅

郭西茅屋經年別嫩藥疎枝入夢頻何處幽尋重相憶  
寒雲野水月如銀

為何彥脩題縣厓古木圖

古木蒼蒼帶女蘿峰陰斜蘸石潭波十年不到屏風疊  
夜雨茅檐幽夢多

與何重容

百尺長松不記年石牀敲帽午陰圓何郎茅屋相憐住  
為煮新茶汲澗泉

題扇

揚州何遜多才藻秋水金塘豔碧渠深院閉門芳草合  
小簾低護殺青書

重過北澗和韻

北澗蒼蒼古木長南塘夜雨落花香重來萬事堪惆悵  
翦燭西窻共一觴



三友圖

冰顛玉節間苔枝瘦影參差落墨池最憶山陰殘雪裏  
西窻相對鬢如絲

和貳守漫興

鄱陽春水渺連空煙嶼飛花遠近紅石渚買魚新斫膾  
一時風致似吳中

宿西峰懷舊

得失浮雲聚散間陸機先識媿張翰無端一派西安水

故作愁聲入夢寒

題墨梅二首

茅屋蒼苔野水濱  
歲寒冰雪久相親  
江湖後夜扁舟夢  
猶記尊前對玉人

仙館曾逢玉帶姿  
夢中要作曉寒詞  
於今相對情如水  
唯有清霜繞鬢絲

寫墨竹一枝

為君粘筆寫篔簹  
數尺新梢綠粉香  
持向西窗聽夜雨

高情渾似對瀟湘

為彭子弘題漁釣圖

彭郎磯畔小茅堂  
露滿秋林木葉黃  
石渚水生魚欲上  
一江風雨夜鳴榔

題北澗精舍

石田流水繞生苔  
翠竹蒼松傍舍栽  
恰似輞川莊裏住  
華門斜對芰荷開

南湖先生貢性之

性之字友初尚書師泰族子也元季以胄子除  
簿尉後補閩理官明洪武初徵錄師泰後大臣  
以性之薦性之避居越之山陰更名悅從兄弟  
同仕於朝迎歸金陵宣城俱不往躬耕自給以  
終其身門人私諡曰貞晦以世家宣城之南湖  
因號南湖先生有南湖集藏於家弘治間六世  
孫吏部員外郎欽出示李少師東陽少師稱其  
詩清新可傳為刪去什之一付欽刊刻行世錢

唐田參議汝成謂友初詩才清麗但纖濃乏骨  
其湖上春歸吳山遊女送戴伯貞還廣西諸詩  
叙事委曲而感慨係之出諸作之上今其集中  
如游魚出沒不多个白鳥往來時一雙洞簫吹  
徹聲如縷釣艇歸來小似梭叱撥穩馱夸女醉  
猩紅新染毳袍深雲將雨意驚秋早雁帶邊聲  
入座遙蒼梧山暝雲連樹青草湖春水拍天烏  
藤拄杖扶來瘦絳色輕袍製得方晴雲接地深

遮屋春水穿船直到門亦多傑出之句也

送盧思敏歸天台

天台山高四萬八千丈神神之徒往往窟宅乎其間我  
嘗探竒恣玄覽直上絕壁窮躋攀松風流水聲瑟瑟桃花  
玉洞春漫漫曾逢兩仙人對奕猶未殘檐簪白髮長被  
耳千二百歲如童顏手攜綠竹杖劍佩黃金環見我拂衣  
起念我行路難問我何從來延我啟重闕授我長生訣  
餌我金霞丹餐松齧柏飲沆瀣伐毛洗髓滌肺肝吁嗟

凡骨不易蛻失身又復歸塵寰始知神仙有術終不可  
以遽學使我夢寐至今夜夜空與相往還盧郎天台人  
縛屋天台下半年少事遠遊仗劍歷中夏才華擅文藻富  
貴若土苴曳裾恥王門望雲念親舍浩然欲歸養即日  
具鞍馬上堂奉旨甘載拜獻杯罍適此舞綵歡勝彼途路  
者父母見子歸喜氣揚雙看親戚饋壺漿隣里將豚雞  
慰藉遠歸人老幼咸熙熙但諳風俗淳不識亂與離因  
君重念山中好歸來已覺輸君早汨沒塵埃徒我慙顛

頽形容漸枯槁今君往矣誠難留殷勤為謝羣仙道  
明年二月春正繇期爾山中拾瑤草

高山流水圖

山雲飄蕭山月涼溪風颯沓溪流長山水遺音秋滿耳  
似與琴響參宮商若人領此山水勝漫託冰絃寄幽興  
天空自覺響逾寂指落先與心相應音傳今古知者稀  
孰云舉世惟鍾期仰天為爾一長嘯音兮琴兮知不知

題扇



鮫人夜織綃滿機并刀翦碎光陸離歸來斫斷珊瑚枝  
製就明月初圓時南洲溽暑醉如酒朝攜暮攜常在手  
從此相親成狎友縱使分違應不久祝融峰頭重回首

牧牛圖

溪童飲牛渡溪水牛遇水深行復止人知水深牛不行  
誰識回頭顧其子桃林之野春雨晴燒痕回綠春草青  
太守勸農當二月土膏肥煖牛可耕邯鄲城頭征戰息  
甯戚徒勞吟白石一聲笛裏太平歌牛背溪童自朝夕

題山農畫梅

大庾嶺頭春信早十月梅開照晴昊曾騎官馬隴頭來  
百里梅花夾馳道夫君元是嶺南人自言家近羅浮邨  
種梅繞屋一萬樹玉為肌骨冰為魂得官遠向西湖住  
喜與林逋作賓主夢回酒醒霜月寒又見梅花在窗戶  
笑倩傍人為寫真相看如見嶺頭春一聲長笛月欲落  
腸斷梅花身後身

溪山小隱和胡虛白韻

我聞神仙之國伐毛兼洗髓遠在西海西邊蓬萊之弱  
水我生有夢不可到髣髴君家畫圖裏溪流冷浸玻璃天  
層巒疊嶂含雲煙渡頭楊柳綠如染洞口桃花紅欲然  
老夫已借過看杖來聽松泉弄幽響雲中雞犬知幾家  
胡麻已熟雕胡掌此中此樂何紆餘赴隴無煩來鶴書  
便欲相從學耕釣細和山聲同水調

題畫梅

江南十月霜雪飄杖藜東郊復西郊酒酣不憚行路遙

蹋徧第六西湖橋北風獵獵吹枯梢青天有鶴不可招  
逋仙起舞來解嘲請君與我看此高堂素壁一幅之生  
綃

青山雲一鴈圖

青山青青欲斷青山斷處雲如幔人家深住鴈東頭剛  
被雲遮一多半山兮雲兮窅莫分雞犬遙隔雲中聞有  
時隨風或凌亂長日與山相吐吞城中車馬多如織沒  
馬紅塵深幾尺只有富貴解留人且與雲山未曾識吁

嗟山中人夢憶雲中君  
卷舒隨所適放浪由天真  
我昔西游登五老五老諸峰插晴昊  
酒酣放歌謫仙句擬共雲松結巢好  
江郎自是青雲姿按圖笑索雲山詩  
從來知爾出山去為雨為霖當及時

題息齋竹次韻

憶昔舟泊湘江時青天皓月流素輝  
美人騎龍上天去遊魂夜半招不歸  
興來一飲三百斛醉倒肯惜千金揮  
孤鸞隨影秋水碧鷓鴣叫入蒼雲飛  
涼飈颯颯似鳴籟

翠霧漠漠如張幃  
胸中氣吐萬菑苗  
筆底勢走千明璣  
飈車搖搖渺何許  
疑是柱頭丁令威  
風流雲散世已遠  
蕭條遺墨人間稀  
眼前頽仰卽千載  
底問誰亡復誰在  
我來見畫如見人  
往事悠悠付深慨  
挂之高堂素壁中  
老氣凜凜迴長風  
狂歌起舞還自惜  
笑看白日行青空

宮梅圖

瑤樓夜寒銀漏溢  
滿地霜華月光白  
翠禽啼斷夢中魂  
窈窕虛窗碧紗隔  
千門深鎖含章宮  
未許人間識春色

只愁笛裏曲聲哀零落香鈿點妝額

百馬圖

烏桓城頭春雨晴烏桓城下春草生百靈長養少畋獵  
牧馬曉出烏桓城騰驍馳突各異態饑齧渴飲仍縱橫  
健兒獨誇好身手上馬捷若飛鳶輕青絲不鞚錦鞍却  
什什伍伍爭先行官長遙望拍手笑落日半照旌旗明  
憶昔開元全盛日四十萬匹俱龍精驕驕駉駉總神物  
駿氣上貫房垣星只今四海罷征戰含哺鼓腹歌昇平

英雄用武已無地  
一月底用千里程  
丁寧伯樂倘一顧  
爾價頓使千金增

題畫

城中車馬多如雲  
林下相逢無一人  
城中甲第十萬戶  
林下草堂空四隣  
胡為奔走上城市  
歸來兩袖飛黃塵  
高堂素壁忽見畫  
使我頓覺清心神  
何時此地一相就  
坐席甘與漁樵分  
借君清澗濯雙足  
借君松枝懸肉巾  
更須長揖謝軒冕  
相期歲晚終吾身



題楊文昭為劉敬思畫

我家茅屋滄江邊，屋頭高樹雲相連。  
秋聲六月常在座，髣髴兩耳聞鈞天。  
鵠來城市住未久，已覺塵埃滿衣袖。  
高堂素壁忽見畫，風雨如聞龍怒吼。  
憶昔劉郎多好奇，七尺長身玉雪姿。  
眼中為惜棟梁具，笑倩楊昭圖畫之。  
楊生好畫亦成癖，醉墨淋漓不停筆。  
遠山近水漫塗抹，鐵榦蚪枝儼行立。  
一時清致俱寂然，惟餘此畫人間傳。  
精神恍惚奪造化，意象慘澹含雲煙。  
吁嗟二公不復見。

把玩令人竟忘倦老夫白髮已如此往事悠悠淚如霰

雪山竹房為王御史題

海天冥冥同一色雪花墜地大如席  
大凶巽負號長風片片吹落淇園中  
淇園之中何所有琅玕箇箇青龍蔥  
琅玕白雪兩相敵萬籟無聲畫琴寂  
孤鸞獨鶴手可招玉龍翠蚪寒不蟄  
此時獨有高潔人愛此瀟灑來相親  
手攜神仙綠玉杖行隨玉樹歌陽春  
歲寒之節世不識挺挺長身抱虛直  
會待金烏出暘谷環佩鏘鏘弄蒼玉

始知不與雪俱消要與人間洗塵俗

題畫

琳館依珠樹青山走游龍水流疑動石雲低不礙松將  
尋采芝侶於此謝塵蹤

題畫鷺鷥

秋堤柳疎疎秋塘荷葉枯水淺微露石水清還見魚飲  
啄各自適樂哉此春鉏

題畫

衆峰涵夕陰羣水澹秋色  
逶迤見古道蕭條少行客  
雖無桃花源亦與塵世隔  
縱有扁舟來重尋恐難得

夜宿書舍

齋居頗幽敞洞然啟八窻  
梧影落几席密葉如青幢  
韋編既滿座濁酒亦盈缸  
矯首青天鶴時時來一雙

梅花扇

香雪綴晴梢東風暖未消  
路經蘇小墓船泊段家橋  
瘦倚吟邊竹寒低月下簫  
逋仙杳何許千古若為招

過破衣庵訪阮子昌

行過河西曲來尋小阮家  
繞籬都種菊十月未開  
花遠樹含秋色輕雲護  
晚霞也須頻到此隔屋  
酒堪賒

題畫

窻戶碧玲瓏看山面面通  
樹涵雲外雨涼渡水邊  
風淪茗啖童嬾揮毫對  
客雄笑談如著我也入  
畫圖中

題王師文半篷春雪圖

香是臨流得詩因倚權  
成岸移驚樹轉牆礙  
覺枝橫似

陽僧廬見如緣閣道行傍人歌斷處疎影月三更

清江圖

江驛背孤城江流繞舍清露枰松下奕驛騎柳邊行帆  
落晴窗影鐘傳雨寺聲堆牀餘簡帙列座總耆英燕語  
能留客鷗馴解結盟詩郵趨堠吏衙鼓集關兵薄俸尊  
仍滿新知蓋屢傾不才翻自媿何以答深情

題畫山水

山水東南勝遊遨歲月遷登高頻折屐載月屢移船鏡

水荷花裏秦雲嶺樹邊猿偷霜果下鹿借石牀眠野趣  
閒誰適詩懷靜自便洞深通窈窕澗曲寫之玄采藥時  
逢虎看碁或遇仙僧留題竹字鶴避煮茶煙捷徑惟增  
媿移文只浪傳種桃春萬樹別有武陵天

送葉南夫

君家盛事古今稀九十雙親七十兒四百人中同戍日  
八千里外獨歸時尊前舞袖花前酒畫裏關山卷裏詩  
親故爭傳看遠客不妨銀燭夜筵遲

越山清曉

曙光晴散越王臺，萬壑千巖錦繡開。  
敲枕僧鐘雲外落，卷簾漁唱鏡中來。  
樹藏茅屋雞聲斷，露溼松巢鶴夢回。  
安得畫圖分隙地，移家仍住小蓬萊。

送人之靖州從軍

十年書劍遠從軍，萬里驅馳淨虜塵。  
報國有身甘負戟，思親無日不霑巾。  
馬嘶青海邊頭月，人卧黃沙磧裏春。  
看取漢庭功策在，要將圖像入麒麟。



登越王臺次任初韻

芙蓉城郭自天開  
形勢盤回亦壯哉  
風作鳴潮吹雨散  
山如走馬渡江來  
王圖霸業今何在  
越寺吳宮莫漫哀  
此日明年各何處  
更須扶醉一登臺

夜聞漁歌

一聲高徹一聲低  
憑仗東風度水西  
著意聽時腔轉細  
斷人腸處思先迷  
雁驚何處沙邊渚  
船泊前邨月下溪  
不道客愁愁不醒  
要隨羌管入雲齊

重過姑蘇有感

昔客蘇臺鬢未霜不知塵世有悲傷  
聯詩刻燭過三鼓一月看花醉幾場  
紅袖舞殘歌緩緩錦箏彈罷雁行行  
重來底用嗟興廢亦有咸陽與洛陽

約遊山阻雨

春事無多苦未晴數來花信過清明  
都將酒債兼詩債付與風聲共雨聲  
燕落香泥霑紙重蝶翻飛絮入簾輕  
懷人久負南山約縱有南山不可行

寓毘陵旅邸

月光涼墮夜堂深  
草草杯盤款款斟  
歡喜情懷無復舊  
別離時節又從今  
坐消爐篆清煙細  
聽徹壺籌玉漏沈  
關隴祇緣頻作客  
翻令兒女訝鄉音

送別

江上船開起櫂歌  
離愁無奈故人何  
桃花流水春三月  
楊柳東風雨一蓑  
送別轉嗟形影獨  
相思從此夢魂多  
到時定有平淮策  
勛業終歸馬伏波

雲錦溪

東西岐路一橋分  
南北人家兩岸邨  
賣酒青帘懸屋角  
采菱小艇繫籬根  
不將姓字通朝市  
只許詩書遺子孫  
我亦江湖倦遊客  
卜隣他日願從君

接曹孟圭

曲江新漲黃梅雨  
雨裏客船江上來  
對酒肯辭今夕醉  
有懷能向幾人開  
歌傳皓齒香生席  
舞按纖腰月滿臺  
縱是金吾嚴禁夜  
也須容我更遲回

送陸景宣靖州從軍

蠻荒溪洞極邊頭  
仗劍從軍憶壯游  
楊柳春風千戶落  
旌旗曉日萬貔貅  
路經彭蠡洲前過  
江自巴州峽外流  
早報遠人歸聖化  
貂蟬從古出兜鍪

送王魯從軍

歎息儒冠早誤身  
漫將書劍學從軍  
三千客路多依水  
九點青山半入雲  
曉日旌旗明虎帳  
春風鼓角動轅門  
倚閭望斷慈親眼  
湘北湘南一夢魂

題畫壁

何處江山似此佳  
看君圖畫欲移家  
沙邊洲渚潮渾沒  
雲裏樓臺樹半遮  
叢桂漫歌招隱賦  
種桃誰識避秦花  
晚風吹送歸舟急  
一片征颿帶露霞

讀史

自緣天運不尋常  
勝敗兵家豈易量  
三戶滅秦皆楚語  
重瞳不渡殆天亡  
怒來我亦坑降卒  
事定人能殺假王  
寄與英雄須入慮  
莫教辜負魯連狂

喜魏仲房見過

江上柴門掩夕暉  
客來剛被鵲先知  
出迎不較衣翻著  
對飲寧辭殘倒垂  
話到更深無斷處  
起看月落幾多時  
人生恨不如潮信  
暮去朝還有定期

雪竹山房

此君節操獨凌寒  
冰雪叢中更耐看  
簾幙影迷金鎖碎  
佩環聲動玉闌干  
只疑玄圃翻瓊樹  
錯訝瑤臺舞素鸞  
白戰幾時能著我  
萬竿深處一憑闌

題畫

白沙溪竹溪邊路綠樹青山郭外邨  
釣艇直隨流水出  
僧鐘遙隔暝煙聞  
漫誇李愿居盤谷  
絕勝龐公隱鹿門  
如此故鄉歸未得  
看君圖畫一消魂

送戴伯貞檢校還廣西

桂江煙水接瀟湘  
速客歸來一作南歸道路長  
卷裏漫多新

制作篋中猶是舊衣裳  
逢人且一作盡說身如夢一作如水

老我相看鬢已霜  
此去莫教音問隔一作斷雁飛今喜一作



已過衡陽

水竹軒

萬竹蕭蕭水繞門  
九街車馬自晨昏  
晴天波影搖窻戶  
靜夜秋聲入夢魂  
曾為故人頻下榻  
每因佳客屢開尊  
百年清致今猶昔  
春雨深深長子孫

城南耕隱

愛爾城南隱者居  
春田繞屋總膏腴  
兒孫候暖晨驅犢  
燈火分涼夜校書  
入社有懷占樂歲  
趨朝無夢候公車

相逢自歎飄零久，投老歸來媿不如。

次萍居留別韻

且勿長亭折柳枝，離筵已判酒如池。  
因思會面難期處，直使銜杯到醉時。  
鶯燕留人雙上下，岸花迎客半低垂。  
計程明日毘陵道，吟寄新詩欲倩誰。

井南丹室

仙翁隱處存丹井，汲井憐居復鍊丹。  
朱汞夜隨雲氣合，翠煙晴掩月光寒。  
鬼知火候窺靈竈，虎作人形護藥闌。

我亦卜隣從此老蓬萊不隔海漫漫

贈別鄉友芮公

麟諱

老去親朋見面稀見時無計得同歸  
遊絲落絮都成恨社燕秋鴻各自飛  
杜宇叫殘孤館夢西風吹老故山薇  
明年春雨南湖漲擬把長竿坐石磯

題畫竹木

木葉已辭柯秋風日更多楚人腸易斷  
莫唱鄂君歌

墨菊

醉折東籬朶看如隔暮煙莫驚顏色改不是義熙年

題畫白頭雙鳥

笑殺錦鴛鴦浮沈浴大江不如枝上烏頭白也成雙

題畫

石瀨清冰合黃山白戰麈道人禁得冷扶醉過溪橋

雀二首

野雀振雙翰卑枝立自閒莫愁風力緊絕勝紇干山  
荆棘半低垂幽禽祇自悲可憐棲不穩不似上林時

題畫

樓倚溪頭水溪環竹外山扁舟垂釣者相對白鷗閒

畫梅

月下獨吟時寒香襲暗衣直疑春信早蝴蝶作團飛

題四季畫為王僉憲作

錄二

春山煙雨

柳帶輕煙澹澹花含宿雨深深魚樂新添曉漲烏啼越

覺春陰

長夏雲林

雨過溪流交響樹涼暑氣潛消不是謝公別墅定應杜  
老西郊

題畫扇四首

三間兩間茅屋五里十里松聲如此山中景色何時共  
我同行

萬事從教計拙千金難買身閒船尾都教載酒船頭飽  
看青山

鴨背灘連溪尾羊腸路轉山腰雲氣晴晴雨雨泉聲暮  
暮朝朝

綠樹灣頭釣艇青山凹裏人家前度劉郎去也莫教流  
出桃花

東坡竹

玉堂罷值獨歸遲墨瀋將秋入研池坐到夜深清不寐  
瑣窗涼影碧參差

畫馬

天閑牽出許一作目奚官飲罷春流未解鞍記得曾陪仙  
仗立五雲深處隔花看

題畫

山接天台路萬重仙家樓閣杳難通不知昨夜溪頭雨  
流出桃花幾許紅

墨菊

朵桑生事日蕭然解印歸來只自憐醉眼不知秋色改  
看花渾似隔輕煙



送別

桃花浪暖錦帆開  
楊柳風輕燕子來  
無限離情隔江水  
隨人直向鳳凰臺

觀畫

滾滾長江入窅冥  
越山無數隔江青  
一雙白鳥誰驚起  
衝破蒼煙下別汀

題犬

深宮飽食恣獐獐  
卧毯眠氈慣不驚  
却被卷簾人放出

宜男花下吠新晴

題竹

美人環珮玉玲瓏  
騎得青鸞下碧空  
寂莫湘魂招不返  
鳳簫聲斷月明中

題梅

平生心事許誰知  
不是梅花不賦詩  
莫向西湖蹋殘雪  
東風多在向陽枝

按貢欽序云時會稽王元章善畫梅得其畫者謂無  
貢南湖詩則不貴重故集中多詠梅詩南湖嘗題絕

句云王郎習次亦清奇盡寫孤山雪後枝老我江南  
無俗事為渠日日賦新詩又云王日日寫梅花寫  
偏杭州百萬家向我題詩如索債詩  
成贏得世人誇其風流可想見也

### 畫馬

偃蹇龍駒不受羈貢來遠自渥洼西天閑立仗歸來晚  
猶向東風振鬣嘶

### 題畫梅送友人

折梅江上贈人行此是東風第一程從此不須憑驛使  
看花直到豫章城

題畫

風來水面綠生波  
雲淨山頭翠擁螺  
白鳥驚飛昔人去  
一聲何處采菱歌

送人回黃山

望斷秋空白雁過  
故人書問轉蹉跎  
無端又與君相別  
添得茗溪夢更多

畫梅便面

嫦娥深住廣寒宮  
不許人間信息通  
秋來折盡婆婆桂

偷得寒香在月中

洞庭秋月圖

一天秋水浩無涯  
短葦蕭蕭泊暮槎  
知是夜涼明月出  
解將雁影落平沙

題畫竹

鷓鴣啼望水龍吟  
舟過湘江夜雨深  
清思滿懷無著處  
却將墨沼寫秋陰

題盧東牧雲山

風流爭解說盧郎墨瀟淋漓入醉鄉雲白山青隨意寫  
一時不數米襄陽

題畫梅四首

濕雲壓地雪花乾一日狂風十日寒不管春光滿隣屋  
却從牆角借來看

美人別後動深思春到南枝總未知記取灞橋明月夜  
忍寒花下立多時

羅浮山下著青鞋蹋雪曾看爛漫開好似人家茅屋底

一枝先占短牆來

十月江南正苦寒  
花開如雪雪成團  
如今老盡咸平樹  
只寫前身畫裏看

陶靖節像

解印歸來尚黑頭  
風塵吹滿故園秋  
一生心事無人識  
剛道逢迎媿督郵

題畫蒲萄松鼠

猿似彌猴捷似猱  
栗梢走過又松梢  
紫萄若使知滋味

一日能來一百遭

畫蓮

吳王宮殿水流香  
步屣廊深暑氣涼  
長日香風吹不斷  
藕花多處浴鴛鴦

題畫

桃花紅綻斷橋邊  
楊柳垂陰散綠煙  
記得少年曾取醉  
玉人扶上總宜船

暮春二首



吳娃二八正嬌容  
鬪草尋花趁暖風  
日暮歸來春困重  
鞦韆閒在月明中

惜花公子愛春晴  
駿馬驕嘶曉出城  
半醉歸來人共看  
笑將金彈打流鶯

雲山圖

鴨浦灘頭燕尾分  
西風吹老樹無根  
何人醉灑淋漓墨  
半是青山半是雲

題畫

多景樓連鐵甕城壯游猶記昔年曾  
江心遙見金山寺  
風裏鐘聲塢外燈

題梅

第六橋頭雪乍晴  
杖藜曾引鶴同行  
詩成酒力都消盡  
人與梅花一樣清

百舌

聽徹千聲與萬聲  
掠花穿柳漫多情  
可憐不及岐山鳳  
立向朝陽試一鳴

題畫

雨蒲煙草接風湍望入蒼梧九點寒  
怪得歸帆如馬健  
有人樓上倚闌干

蘭竹

翠鸞飛下尾穆穆怪石嶄巖倚碧潭  
一路鷓鴣啼不斷  
行人揮淚溼征衫

寄友人

瘴雨蠻煙萬里餘別來消息近何如  
誰憐白髮疎狂處

猶寫平安兩字書

紅梅翠竹

仙子羅浮侍宴來  
笑扶殘醉下瑤階  
東風不管雲鬟亂  
吹折雙雙翡翠釵

書所見

使者徵兵夜度關  
南人無奈北風寒  
將軍空受登壇拜  
羞向燈前把劍看

桃花雙鳥圖

茂陵帝子宴瑤池翠管銀笙取次吹  
王母不來桃未熟  
可憐雙鳥立多時

雲山圖二首

百折溪流路轉深  
溼雲低壓樹陰  
陰山中底事如秦晉  
剛被漁郎說到今

閒身閒看白雲閒  
更愛青山嬾出山  
別起樓臺半空裏  
只教鐘鼓落人間

題竹

翩翩么鳳下晴空半入江雲半落風憶昔瀟湘泊船處  
玉簫聲斷月明中

墨蒲萄

酒醒西樓月欲斜滿窗晴影走秋蛇狂夫賸有相如渴  
一滴涼州未許賒

枯木竹石

怪石犖确厓谷深涼風蕭瑟蒼雪陰美人何處解長佩  
湘波澧水勞余心

題畫

月明風靜夜如何  
船向三江七澤過  
涼影滿篷成獨坐  
半聽楚調半吳歌

柯博士竹

丹丘遺老舊詞臣  
歷代圖書鑒賞頻  
閒却玉堂揮翰手  
墨池染出鳳毛新

觀奕圖

笑殺王郎底事癡  
斧柯爛盡不曾知  
却拋塵世無窮樂

只博山中一局棋

畫蘭

吳剛斫斷雲根石不數珊瑚高百尺美人林下獨含愁  
霹靂一聲山鬼泣

過鑑湖二首

歸思關心路轉遙打頭風急滯蘭橈夕陽江上秋無數  
血點蜻蜓立碧苔

南風吹斷采蓮歌越女船開小似梭却恐紅妝不成態



背人偷照鑑湖波

畫梅二首

朔風撲面凍雲垂  
引鶴衝寒出郭遲  
却憶西湖霜月下  
美人相伴立多時

江城鐘鼓夜迢迢  
霜月多情照寂寥  
更有梅花是知己  
小窗斜度兩三梢

題菜二首

西風吹動錦爛斑  
曉起窺園露未乾  
三日宿醒醒不得

自少入  
卷二十二  
正思風味到辛盤

雨過畦蔬綠漸勻呼童小摘慰情親  
箇中滋味如諳得不是尋常肉食人

凍鳧

江天歲晚景淒淒雲脚低垂望欲迷  
水鳥畏寒飛不起黃蘆枝上並頭棲

題畫

此生無夢到京華到處谿山即是家  
昨夜石橋新過雨

錯教劉阮認桃花

題梅四首

美人吟苦減腰圍瘦影玲屏不自支只有梅花是知己  
相逢多在月來時

十年癡坐冷官羶幾度看花雪後天白水同心如此調  
載將春色上歸船

萬里無雲月正高翠禽啼斷酒初消靈均自是非知己  
不寫芳魂入楚騷

金瓶梅詞話卷二十二  
寒氣稜稜雪作晴  
看花獨自出郊行  
北枝未吐南枝發  
笑殺春光也世情

枯木圖二首

湖石東頭太液西  
春風宮樹半高低  
王孫金彈多如雨  
不著黃鸝一箇啼

翠蘿牽恨引絲長  
黃葉將風戰曉霜  
莫怨一枝棲未穩  
上林春樹近昭陽

白描海棠花

美人睡起不柰愁  
弄粉調朱只漫羞  
閒倚綠窻春晝靜  
雙鸞飛上玉搔頭

題畫

擾擾黃塵沒馬鞍  
幾人消得此中間  
綠陰清晝深如水  
飽看溪南雨後山

題翠竹紅梅

美人燕罷酒初消  
凌亂雲鬟壓步搖  
莫遣翠禽啼夢斷  
醒來無處託春嬌

題畫

一江春水晚微茫  
醉倚篷窗客思長  
忽聽簫韶雲外落  
松風輕度鬢絲涼

梅

眼中誰識歲寒交  
只有梅花伴寂寥  
明月滿天天似水  
酒醒聽徹玉人簫

戴春雨

長江煙水接蓬萊  
百尺風帆破浪開  
二月桃花春雨裏

候人還向水邊來

題畫翎毛

莫怪幽禽雪滿頭多情只為海棠愁  
開元宮裏千株錦  
一夕西風起碧秋

題肅萬邦蒲萄

憶騎官馬過灤陽馬乳纍纍壓架香  
釀就瓊漿三百斛  
胡姬當道喚人嘗

題美人圖

離離珠樹隔秋煙望斷歸帆信杳然試問海山今夜月  
不知何處照人圓

湧金門見柳

一作湖  
上春歸

湧金門外柳垂

一作  
如

金三日不來成綠陰折取一枝

一作

得長  
條

入城去使

一作  
教

人知道已春深

吳山遊女

見田汝成  
西湖志餘

十八姑兒淺澹妝春衣初試柳芽黃三三五五東風裏


去上吳山答願香



題紅梅翠鳥圖與唐愚聯句

萼綠枝頭翠羽鮮貢春風早入豔陽天  
幾回夢覺頻聽

處唐正是書聲欲斷邊貢



元詩選二集卷二十二